

**Himpun optimis satu juta  
Utusan Online  
October 20, 2011**

KUALA LUMPUR 19 Okt. - Penganjur Himpunan Sejuta Umat (Himpun) optimis dapat mencapai matlamatnya untuk mengumpulkan satu juta umat Islam di Stadium Shah Alam, Sabtu ini.

Setiausahanya, Aminuddin Yahaya berkata, setakat ini, sebanyak 2,100 pertubuhan bukan kerajaan (NGO) negara ini telah menunjukkan sokongan terhadap perhimpunan yang bertujuan menyelamatkan akidah umat Islam daripada gejala murtad itu.

"Sokongan padu umat Islam ini akan diterjemah kepada satu kekuatan serta permuafakatan yang kukuh dalam menolak serta membendung gejala keruntuhan akhlak yang mengancam kedaulatan agama sejak kebelakangan ini," katanya kepada *Utusan Malaysia* di sini, hari ini.

Dalam pada itu, Setiausaha Gabungan Wawasan Generasi Felda (GWGF) Kamarulzaman Mohamad berkata, penyertaan GWGF itu merupakan antara usaha pihaknya menzahirkan sokongan terhadap agenda memelihara akidah umat Islam di negara ini daripada segala bentuk dakyah memurtadkan orang Islam oleh pihak-pihak tertentu.

"Ini kerana, isu membabitkan akidah umat Islam merupakan satu isu sensitif yang wajar diberi perhatian khusus serta dihormati oleh semua pihak bagi menjaga keharmonian kaum serta agama mengikut Perlembagaan Persekutuan.

"Justeru, GWGF akan menghantar lebih 10,000 orang peserta di kalangan warga Felda dari seluruh negara untuk menyertai perhimpunan itu," jelasnya.

Presiden Pertubuhan Pribumi Perkasa Malaysia (Perkasa), Datuk Ibrahim Ali pula berkata, pihaknya sentiasa menyokong sebarang kerja-kerja menjaga kesucian agama Islam tanpa mengira fahaman politik.

Sehubungan itu, beliau telah mengarahkan semua ahli Perkasa terutama di Selangor dan Wilayah Persekutuan menghadiri perhimpunan itu beramai-ramai bagi menunjukkan sokongan mereka terhadap usaha murni ini.

"Umat Islam secara amnya, ayuh bersama-sama memberi sokongan terhadap perhimpunan ini sebagai platform perpaduan umat Islam di negara ini demi agama yang kita cintai ini," tambah Ibrahim.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2011&dt=1020&pub=Utusan\\_Malaysia&sec=Politik&pg=po\\_05.htm](http://www.utusan.com.my/utusan/info.asp?y=2011&dt=1020&pub=Utusan_Malaysia&sec=Politik&pg=po_05.htm)